

BETICO CROES: POLITICO CU PODER ABSOLUTO NA ARUBA

ORANJESTAD: Betico Croes a nace dia 25 di Januari 1938. Su nomber oficial ta Gilberto François Croes.

Despues di Lagere school y 3 aña HBS el a viaha pa Hulanda unda el a logra su Hoofdkarte.

Na su regreso na Aruba el a sigui cu su profesion di maestro di school y a eherce esaki te na 1969.

Den su tempo liber mientrastanto el a logra su aktenan di L. O. Spaans y L.O. Handelskennis.

Na 1967 el a drenta politica y tabata miembro di partido di pueblo Arubano, AVP y number cinco ariba lista.

Dia prome di juli 1967 el a bira miembro di Eilandsraad y a bira diputado di Enseñanza. Esaki tabata e prome y ademas e ultimo funcion di gobernante cu el a yega di ocupa.

Despues di pleito interno den partido encunto liderazgo, el a bandona AVP y dia 9 di februari 1971, a funda Movimiento Electoral di Pueblo, MEP, un partido cu for



di principio den su declaracion a laga sa cu nan meta ta pa trece un cambio fundamental den constelacion di reino hulandes.

Durante e campana electoral cu a sigui

tabata riparable cu MEP tabata busca separacion di Aruba for di constelacion Antillano y mantene lazo directo cu Hulanda.

Realidad ta cu el a rebiba deseo di Hen-

ny Eman, abuelo di prome ministro Mr. Henny Eman, di Separacion.

E ideanan di MEP a pega y den e prome eleccion caba cu e partido a participa aden

despues di su fundacion, MEP a logra 7 di e 21 asientonan den Eilandsraad. Na 1975 MEP a logra mayoria absoluto bao di liderazgo di Betico Croes.

Cu esaki a cumin-

za un periodo di 10 aña den cual e tabata manda completamente na Aruba.

E maneho aki tabata ser sigui cu preocupacion na Aruba y ariba otro islanan di Antillas y hasta na Hulanda a ser expresa cu nan ta mira actitud di Sr. Betico Croes como un amenaza serio pa democracia na Aruba.

Betico Croes tabata tin poder incontrollable pa motibo cu e no tabata ocupa ningun funcion gubernamental.

El a laga Bestuurscollege nombre como Consehero General di Bestuurscollege y for di e funcion aki e tabata actua manera un president di Aruba.

Ningun decision por a ser tuma si e no a duna su aprobacion prome. Decisionnan cu ser tuma durante su ausencia y locual e no tabata di acuerdo cune tabata ser cambia door di su persona cu facilidad.

Su funcion como Consehero General a pone cu Eilandsraad no por a controle tampoco. E tabata intocable pa Eilandsraad.

MESTER CONSERVA IDEALNAN DI BETICO

NELSON ODUBER TA BISA NA MILITANTENAN DI MEP

ORANJESTAD: Segun Lider di Fraccion di MEP, alavez Secretario General di e partido, e no a spera noticia di fallecimiento di Betico Croes.

El a splica cu fallecimiento di Betico Croes tabata un sla duro, despues di e noticia nan poco alentador di fin di siman encunto traslado di Betico Croes di un hospital pa otro, y cu tin un leve recuperacion.

Sr. Nelson Oduber a bishita e familiar nanayera madrugada.

MEP a keda conmovi y e familiar nan

tambe ta masha conmovi y tristo.

Segun Sr. Oduber pa e familia, pa familia di Betico y pa Aruba fallecimiento di Betico tabata un sla duro pasobra tur hende conoce como un homber cu a dedica henter su bida ariba un ideal cu e mes door di e desgracia no a logra mira e realizacion prome di januari 1986.

"Ma biba pensa cu Dios lo trece back cerca nos pa e mira Aruba como un pais den reino. Lamentablemente e no a logra esey.

"Pa mi cu a traha

hopi aña cerca di dje, pami e ta un gran estadista Arubano pero tambe den reino y sigur el a pone Aruba ariba mapa internacionalmente.

"Su labornan ta grandi y cu duele na mi curazon mi ta bisa su familia pa nan tin forza den e momentonan dificil, y na e militantenan di partido, laga nos conserva su idealnan y sigui lucha pa e pueblo aki, pasobra progreso di Aruba ta di nos tur, y nos tur mester yuda contribui y mira con nos lo sigui awor", segun Sr. Oduber.



STATEN DI ARUBA

cu honda pena ta participa e fallecimiento inespera na Hulanda di senior

GILBERTO FRANCOIS (BETICO) CROES

ex-miembro di Parlamento di Territorio Insular di Aruba y di Staten di Aruba, ex-miembro y ex-presidente di Staten di Antillas Hulandes. Su recuerdo semper lo keda den nos memoria.

Presidente di Staten di Aruba,
P. Bislip